



**Gemeinsam Äntwert vun der Madamm Gesondheetsministesch, dem Här Verteidigungsminister an dem Här Staatsminister op d'parlamentaresch Fro n° 5480 vum 7. Januar 2022 vun den honorabelen Députéierten Här Fernand Kartheiser an Här Jeff Engelen.**

1) D'Sécherheetsdéngschter hei am Land (CGDIS, Police, Arméi, asw.) sinn all vun der aktueller Pandemie-Situatioun betraff. Ass et dowéinst an den Ae vun der Regierung justifiéiert, fir elo d'Impfflicht nëmmen an engem vun deenen Déngschter anzeféieren, vu que datt de Critère vun der Operationnalitéit jo déi Verwaltungen allequer betrëfft?

2) Bei der Reform vum Policegesetz gouf, eises Wëssens, d'Impfflicht fir d'Membere vun der Police ofgeschaaft. Missten d'Membere vun der Force Publique an där Hinsiicht net all d'selwecht behandelt ginn?

Wéi déi honorabel Här Deputéierte bestëmmt wëssen, huet d'Regierung eng breet Consultatioun vun der Politik an der Zivilgesellschaft iwwert d'Fro vun enger eventueller Aféierung vun enger Impfflicht lancéiert, dëst nodeems en Ad hoc Grupp vun onofhängegen Experten chargéiert gouf, dës Fro vun engem wëssenschaftlechem Standpunkt ze klären. D'Regierung wäert dës Consultatioun ofwaarden, är si eng Décisioun iwwert d' Aféiere vun enger Impfflicht hëlt.“

3) Iwwerhëlt de Staat d'Haftung fir déi medizinesch Niewewirkungen, déi duerch d'Flichtimpfung bei verschiddenen Membere vun der Arméi opriede kéinten?

D'Gesetz vum 4 Juli 2000 iwwer d'Responsabilitéit vum Staat am Zesammenhang mat den Impfungen ass applicabel am Fall wou schwéierwiegend Niewewirkungen no enger Impfung oprieden (Loi du 4 juillet 2000 relative à la responsabilité de l'Etat en matière de vaccinations). Et mussen allerdéngs 3 Konditiounen erfëllt sinn fir datt den Staat eng Entschedegung iwwerhuelen kann:

- Bei der Impfung muss et sech em eng vum Staat virgeschriwwen oder recommandéiert Impfung handelen;
- Den Doud oder eng permanent physesch Inkapazität vun enger Persoun ass op d'Impfung zeréckzeféieren;
- De Schued kann nët duerch d'sécurité sociale en charge geholl ginn.

4) An der „Version consolidée au 18 décembre 2020 » vum « Règlement grand-ducal du 18 octobre 2001 déterminant la liste des vaccinations recommandées » gëtt och d'Impfung géint SARS-COV2 ernimmt. Steet dësen « caractère recommandé » vun der COVID-19-Impfung nët a Widdersproch zur agefouerter Impfflicht fir Membere vun der Arméi ? Misst dës Impfflicht net un ee konkret Gesetz gebonne sinn, wat et am Ablack nach net gëtt? Wéi eng medizinesch Sécherheetsbestëmmungen a –kontrollen a wéi eng legal Prozedure besti fir d'Membere vun der Arméi, fir datt déi Dispositioun vum Art. 3 aus dem Gesetz vum 16. Abrëll 1979 net kann iwwerinterpretéiert a beispillsweis op Substanzen applizéiert ginn, déi nach keng definitiv Zouloossung vun de kompetenten europäeschen Instanzen hunn?



D' « Loi modifiée du 16 avril 1979 ayant pour objet la discipline dans la Force publique » ass d'legal Basis fir déi agefouerten Impfflicht. Dohier steet de « caractère recommandé » vun den Impfungen am modifizéierten « Règlement grand-ducal du 18 octobre 2001 déterminant la liste des vaccinations recommandées » net am Widdersproch domadder dass d'Militärpersonal eng Impfung ka virgeschriwwe kréien.

Am Fall vun der Impfung géint de COVID gouf vum legale Standpunkt net anescht gehandelt wéi an der Vergaangenheet bei anere recommandéierten Impfungen, an dëst ënner Considération vum den allgemenge wëssenschaftlechen Donnéeën op deenen dës Recommendationen sech stützen.

Impfungen ginn deemno generell och als Hygiène-, Schutz- a Preventiounsmoossnam fir d'Militärpersonal, dat breet asazfäeg muss sinn, agefouert. Des Weidere kënnen Impfungen aus preventive Grënn fir d'Militärpersonal virgeschriwwe ginn, och wann se zu Lëtzebuerg just recommandéiert sinn. Nieft COVID si Beispiller dofir d'Impfung géint Tollwut oder géint d'Zeckenzephalitis, déi deelweis obligatoresch fir d'Auslandsmissionen an d'Exercice sinn.

Wéi an der Äntwert op d'parlamentaresch Ufro 5411 erkläert wier d'Asazfähegkeet vun der Arméi op nationalem an internationalem Niveau ouni déi agefouerten Impfflicht zou engem groussen Deel a Fro gestallt.

Hei sief ënnerstrach dass natierlech och d'Situatioun vun engem Impfpfänger gekuckt muss ginn an hei ënner anerem och all eventuell medezinesch Contre-indicatioun berécksiichtegt gëtt.

5) An der Annexe A („Liste des vaccinations pour le service militaire «) vum « Règlement de l'Armée n°450-40 » vum 25. Oktober 2021 steet, datt d'Impfung géint Covid-19 just obligatoresch ass « pour tout militaire déployable ou personnel civil déployable ». Steet dës Bestëmmung net am Widdersproch zur Ausso vum Här Minister, datt all Member vun der Arméi vum 1. Januar 2022 un ee vollstännegen Impfzyklus géint COVID-19 virweise muss? Hätt een net fir d'éischt missen d'Arméisreglement modifizéieren, ier een d'Impfflicht fir all Member vun der Arméi agefouert huet?

Den Herr Verteidigungsminister verweist op d'Äntwert op d'parlamentaresch Ufro 5411 dass „d'Impfung géint COVID-19 de 25. Oktober 2021 zu den Opnamebedingunge fir an de Fräiwëllegendéngscht an an d'militäresch Carrièren vun der Arméi bäigefügt“ gouf an dass „d'Impfflicht (...) fir d'Personal vun de militäresch Carrièren dat en operationelle Poste besetzt a fir d'fräiwëlleg Zaldoten, déi Member vun enger „Unité de disponibilité opérationnelle“ sinn, agefouert“ gouf, sou wéi et an dem zitéierten Dokument (RA 450-40) steet. Eng allgemeng Impfflicht fir d'Membere vun der Arméi gëtt et net.

Lëtzebuerg, den 19. Januar 2022

D'Gesondheitsministesch

(s.) Paulette Lenert



LE GOUVERNEMENT  
DU GRAND-DUCHÉ DE LUXEMBOURG  
Ministère de la Santé